

徐鉉

王宗信

韋莊

周德權

許寂

劉纂

徐鉉

王宗信

韋藹

李道安

鄭藝

蒲禹卿

樂史

馮涓

吳崇

林罕

王錯

竹居攷屢

全唐文

卷八百九十七之八百九十

德意志銀行

德意志銀行

德意志銀行

德意志銀行

德意志銀行

德意志銀行



德意志銀行

欽定全唐文卷八百八十七目錄

徐鉉 十

岐王墓誌銘

書岐王墓銘後

故平昌郡君孟氏墓誌銘

故昭容吉氏墓誌銘

唐故鍾氏太夫人太原縣太君王氏墓銘

唐故太原府君夫人彭城劉氏墓銘

唐故隴西李氏夫人墓銘



金定台月文 卷之百八十一
唐故文水縣君王氏夫人墓銘

故朝散大夫守禮部尚書柱國河內縣開國男食

邑三百戶賜紫金魚袋常公行狀

文獻太子哀冊文

齊王贈太弟哀冊文

光穆皇后諡冊文

告天地文

祭世宗皇帝文

祭文獻太子文

與中書官員祭江學士文

祭韓侍郎文

祭王郎中文

祭劉司空文

祭慶宮空文
祭王廟中文
祭韓會泗文
與中書官員祭文

欽定全唐文卷八百八十七

徐鉉

十

岐王墓誌銘

天地之靈氣發爲賢人邦家之積慶鍾於公族其或富老
成之智促殤子之年感羣情者自出於天資垂英聲者非
由於事業是以蒼舒軫悼於魏祖裴行曰哀夏王鍾愛於
明皇錫名爲一中興在運代有人傑見於岐王矣王謹仲
宣今上之第二子也文武儲慶日月輸祥實太妣之子如
魯桓之貴天資秀發神機內融亦旣免壞未遑就傅問安

長樂視膳寢門承歡愛於瑤齋極友悌於朱邸成人之量
宛由生知三歲受封爲宣城郡公假大司馬之秩維城之
望日以光矣不幸遘疾甲子歲冬十月二日薨於閣內年
四歲主上痛幼敏之異極天慈之懷詔輟朝七日冊贈司
徒追封岐王旣而感上聖之忘情遵先王之從儉節哀簡
禮以厚古風卽以其月十有八日備鹵簿鼓吹葬於江寧
府某縣某里之原有司諡曰懷獻禮也惟王以襁褓之年
蘊金玉之度異迹昭灼可得而言至於禁中娛侍常在左
右或異宮一日則思戀通宵翌旦未明必親至御幄須奉

顏色然後卽安其孝也

上每罷朝稍晏莊色未回王

則儼然侍立不妄言笑須天顏悅懌則趨就膝下怡怡穉戲不失其儀中宮以上之鍾愛恐漸於驕故撫字之方威克於愛每加教訓過於嚴厲而王凜然祇畏初不壞容退或見上乃啼而自悔其敬也如此始二歲上親授以孝經雜言雖未盡識其字而每至發端止句之處皆默記不忘至於寢疾近數千言矣時聽奏樂必振袂擊節咸中律度工人試中變其曲王輟止之曰非前曲也雖周郎之顧何以加焉其慧也如此受封之日見於內殿音詞宣朗容止

閑習觀之者咸歎重焉其敏也如此凡玩好之物意有欲者瞬目賞譽未嘗求索或識其意持以與之必再三推却不肯卽受其毅也如此上曰昔人謂王勣爲神仙童子今此兒近是乎及其薨也悼念之甚曰吾見他人賢子弟猶惜之豈惟父子之性乎中宮哀慟至於加疾自非英姿感動孰能臻此哉議者以爲列宿淪精高真降迹表瑞王室今復還矣嗚呼凡我臣庶暨乎藩戚瞻飛蓋之何期慨神理之難測寧盡美於稱讚庶騰芳於簡冊詞臣奉詔謹勒貞石其銘曰

粵我仙源流光慶延公族之異惟王生焉禮詩仁孝斯之
謂賢夙昔非學生知自天旣與之智胡奪其年瞻庭蘭刈
顧掌珠捐孟冬寒氣京兆新阡鼓吹蕭蕭旌旒翩翩踈逸
躅於稚齒閔藩房於夜泉已焉哉庶彭殤之一夢豈沒世
之無傳嗚呼庭蘭伊何方春而零掌珠伊何在玩而傾珠
沈媚澤蘭隕芳馨人猶沮恨我若爲情蕭蕭極野寂寂重
扃與子長訣揮涕吞聲噫嘻哀哉

書岐王墓銘後

又銘一首至尊所作上省庭蘭掌珠之句謂得比興之實

遂廣其意發爲斯文親迂宸翰批於紙尾足以厚君親之
義行慈孝之風是用勒石永光泉戶謹記

故平昌郡君孟氏墓誌銘

太歲癸卯五月十有九日大行皇帝諸妃平昌郡君沒於
大內之別院享年四十有三嗚呼哀哉昔天保未定大東
啟其疆魯道有蕩三桓紀其政實始孟氏代爲強宗德厚
流光之符祥發慶膺之效宜乎來裔生此淑人曾祖某祖
造父及皆以含道居貞遯世無悶克家垂訓式永門風郡
君麗窈窕之容秉肅雍之德游依漢水氣兆河間乃膺八

月之求入預良家之選璧門受職彤管服勤恭順之心奉
坤儀而得禮明惠之智導官教而無遺爰屬造邦遂崇封
邑路寢之後柔芳載揚旣而千載上仙宮車晏駕號遺弓
於萬國感餘香於九御沈哀共極美疹獨縈不延幽窆之
期重惻上宮之念嗚呼哀哉卽以其年六月日葬於江寧
縣安德鄉德信里之原禮也青烏旣吉覆斧斯營永光烈
女之風盡紀他山之石詞臣奉詔謹勒銘云

杳杳平野蕭蕭一邱原松積靄隴吹臨秋吁嗟淑女於此
藏舟委貞質兮厚夜奉靈駕兮仙遊惟悼史兮未泯豈餘

芳兮不休嗚呼哀哉

故昭容吉氏墓誌銘

天子建內官必先令德九嬪掌婦學以教六宮是故壺則成風漢濱流化者矣昭容吉氏麗瑤姬之質富班女之文治絲枲以服勤宮功有序徹粢盛以舉職祀禮無愆本用能妙簡皇心光膺盛典頃錫粉田之賦因開左輔之封嗣服之初日不暇給視月卿而命秩近正朝恩閱逝水以成川俄悲異物春秋三十有三保大三年秋七月二日薨於別宮皇帝悼之廢朝一日遣奠之禮有加等焉卽以其年月

日葬於上元縣龍城鄉之原禮也昭容諱某字某東海朐
山人也曾祖徵朗州龍陽縣令祖黨壽陽縣令父彥輝海
州懷仁縣令咸膺鄉里之選屈從州縣之勞有利物之能
不享其位垂積善之慶克茂其宗著籍金門移家戚里昭
映惇史不其美歟詞臣奉旨式揚懿德庶使高深自改長
延丹砌之恩金石無虧仰慰壁臺之念其詞曰

吉甫作頌穆如清風儲慶炳靈實生昭容史曰明智詩云
肅雍內職以理柔芳有融閱川宵奔然膏曉滅西陸移景
涼風殺節虞殯流聲遣車成列茗華不磨蘭菊無絕

唐故鍾氏太夫人太原縣太君王氏墓銘

夫人太原祁人也。因官徙籍，遂居豫章。自緱嶺肇基，晉陽錫壤，光靈繁祉，蔚爲大宗。圭組簪纓，與世升降。聖歷中，否我亦不彰。故祖考某，皆蘊道居貞，流謙毓德。夫人有金玉之質，桃李之姿，柔順睦姻，以奉慈訓。組紉織紵，勵家風宗族里閭，莫不稱美。先公司徒纘戎，嗣服實臨。我邦夫人，誕昭四德之華，用光九女之選。門內之理，實皆聽之。家人尚嚴，婦道貴順。主饋以敬，均養以慈。契濶夷險，始終若一。邦君內則，皆取正焉。嗚呼！昊天不庸，路寢卽順。夫人棘心

蓬首實由舊章素尚空元益所明習常齋居晏處諷誦眞
文雖祁寒盛暑未嘗廢也又以恭儉孝悌文學道義訓勵
子弟皆成其名保大年詔封太原縣太君從子貴也二子
長曰懷建由校書郎歷東府掾以羣從百口家於豫章於
是辭祿公朝歸綜司政因除洪州都督府司馬次曰蒨以
屬詞敦行從事戚藩累登臺郎爲集賢殿學士會中令齊
王避親讓寵受鉞臨川朝廷慎選英僚以光幕府除撫州
觀察判官檢校屯田郎中旣拜而夫人疾亟交泰元年春
二月十八日卒於京師嘉瑞坊之官舍享年七十有五卽

以某年月日歸葬於洪州某縣某里之原禮也嗚呼富壽
戩穀天所以祐善也金石銘撰世所以垂範也二者無愧
可謂賢哉鉉早奉世親晚連姻好景行懿德敢用直書其
銘曰
緱山不傾清淮不湮故我王氏實生令人衛姬之智孟母
之仁光裕祖禰垂慶來雲西山之陽章江之濱靈仙攸宅
松檟相因遐壽歸全以反吾真

文選

唐故太原府君夫人彭城劉氏墓銘

夫人麗窈窕之容蘊幽閒之德孝敬肇於天性明惠本於

生之七乎六姻是謂賢女初我大父殷考遇皆立功興運
蔚爲將臣婚姻之盛冠彼當代故夫人旣笄歸於我府君
君諱承進州節度使相國公之第三子也二族斯睦百

兩是將婦禮之嚴家道爰正府君性踈直喜賓客理劇如
簡不以世務嬰心行已取適不以家財爲重鐘鼎之族化
爲簞瓢夫人雅性冥符怡然自足慈和待物恭儉飭躬子
孫以之而克家僕御以之而服教及罹蓬首之痛誓全柏
舟之節柔芬方遠景命不融春秋四十有九戊午夏六月
某日終於京師濱江坊里第子某等俯就成制號奉靈輜

卽以某年月日葬於某鄉祔府君之塋禮也鉉幸參諸壻
獲從外姻載陳執紼之儀仍奉懷鉛之託敢書懿範以鏤
貞珉其詞曰
嗟淑女兮仁慈肅雍伊君子兮亮簡踈通含二姓兮五侯
之宗垂內則兮素士之風悲秋霜與冬霰摧女蘿與青
念光塵之倏忽獨天長兮無窮

唐故隴西李氏夫人墓銘

夫人諱某字某其先太原人故左司郎中贈太府卿諱潛
之孫今太弟洗馬裔之第三女也伯仲世父皆踐歷臺閣

抑揚聲實相糾以孝相高以讓芝蘭桃李閨庭粲然夫人
襲圭組之英發爲秀色鍾姻睦之氣凝爲淑性柔而有則
愛而不驕糾組之工翰墨之妙稟自天性能必過人及長
歸於李君君名俛故楚州刺史諱承嗣之孫今禮部尚書
度之少子也舅甥之親齊魯之匹好合之美潘楊之風夫
人移天睦族率由典禮不恃舊以廢職不矜能以怠敬門
內之理清芬穆然嗚呼嚴霜春零薜華朝墜享年二十有
五某年月日卒於京師某里之寓居二族悲慟六姻悽愴
仁而不壽古則有之以其年某月日葬於江寧縣某鄉里

金定全唐文 卷一百一十七
之原禮也東海徐鉉以世親之舊實維私之敬執紼永悼
列石爲銘銘曰

天之命兮不可知生此賢女兮鍾淑姿嬪於盛族兮昭令
儀與之才兮不與之壽永凋落兮芳時儼黼翣道靈輻小
江村兮長江湄千秋萬代兮草離離空餘初月如蛾眉

唐故文水縣君王氏夫人墓銘

夫人諱畹字國香其先太原人今爲廬江人也祖潛左司
郎中贈太府卿考坦禮部郎中皆以貞幹純懿見稱於時
夫人麗窈窕之容秉明慧之性幼失所恃事繼親以孝聞

在家不違於姆師移天不失於婦順初先姑之治家也嚴而有惠通而得禮夫人觀刑稟教莫不率循故三十餘年門風家法凜然如舊性尚靜退不樂世喧始愚之在要職也夫人憂形於色及其居貶所反欣然忘貧此其所以爲異也雖門族素盛而世途多故祿賜所入賙給無遺豐約同之親踈如一至於澣濯之儉組紉之勤蘩藻盡敬儒元勵操環佩中節始終不渝少善秦聲長亦捨棄每晨興誦五千言而已享年五十戊辰歲八月一日終於京師舜澤里之官舍其年十月二十三日歸窆於西山洪崖鄉鸞岡

里從先姑大塋禮也有子曰夷直女曰神華林華嗚呼愚
常以體道委命爲懷而情之所鍾不知其慟銜涕秉筆庶
不泯其聲塵焉銘曰

緱嶺之靈生此淑人洪崖之濱寄此新墳生與道俱沒與
仙鄰悠悠精爽豈或爲塵嗚呼吾信積善之必爾故攄恨
於斯文

故朝散大夫守禮部尚書柱國河內縣開國男食
邑三百戶賜紫金魚袋常公行狀

曾祖某不仕祖澹邠州宣祿縣令考修成都府戶曹參軍

京兆府萬年縣洪固鄉曹貴里常夢錫字孟圖年六十一
歲公字量恢宏識度寬廣質重有氣博學多聞初舉秀才
值世亂不克隨計西州羣后羔雁交辟累爲秦隴諸郡判
官岐王茂貞據有扶風傳國二世承制除公寶雞縣令兼
監察御史是時京洛屢變幕府驟更公審擇木之所宜乃
瞻烏而來止烈祖肇基王業物色異人得公甚喜授大理
司直今上初秉機務慎求賓從公寶預焉允塞時望旣受
禪選殿中侍御史改禮部員外郎寓直中書預聞機密周
慎詳敏冠於當時烈祖深器之擢拜給事中封駁奏議無

所顧憚由是始爲當塗者所疾今上嗣位恩禮甚優公以發號之初四海瞻望幾微所慎宜在斯時盡規極言如恐不及於是大忤權貴貶佐池州明年徵爲戶部郎中復拜給事中仍充翰林學士知貢舉天子以典司詔命最宜親密乃別置宣正院於內庭以先朝選授公爲稱職俾以內任專掌是司秋霜之操歲寒不易凡敢言之士皆依賴焉甲辰歲諫臣皆貶公亦罷院事公深惟君臣之義思全進退之禮稍儲伏臘將卜優游又除吏部侍郎領御史臺事上復置文理院爲司聰之寄以公爲文理院學士承旨公

以椒蘭不雜絳灌方隆從容中道守正而已明年以疾固
辭乃遷戶部尚書領商州刺史上以公問望夙重足以坐
鎮雅俗強起令知省事而病久不覆公私廢失爲宰相所
劾坐貶饒州上以羸瘵憂之詔畱東都以便醫藥踰年小
愈徵爲吏部侍郎翰林學士改禮部尚書戊午歲冬十一
月方與客談奄然而逝主上念藩邸之舊追亮直之誠罷
朝悲悼贈送優渥以嗣子方幼詔中使監護其喪惟公誠
純性剛文高學富詞賦典麗而執筆甚稀名理精覈而吐
論甚簡多識故事洞明政體自昇元中至保大之初便蕃

密勿有犯無隱門絕私謁出則詭辭獨見先覺邈然靡及
 政先古義而時方尚權論舉大體而人工捷給彼眾我寡
 故不能克主恩方重莫果歸田之心世路未夷竟鬱濟時
 之用恥為狷介之行以邀皦察之名畜伎樂飲醇酒怡然
 自得聊以卒歲啟手足之際無呻咄之聲古之達者正當
 此耳丕以名法之學獲選邱門固非良史之才曷記賢人
 之德庶為實錄以俟易名謹狀

此文與門
生樹丕作

文獻太子哀冊文

維顯德六年太歲己未九月癸卯朔四日丙午文獻太子

薨於東宮延春殿以其年十有二月壬申朔十三日甲申
遷座於文園禮也象輅差階龍樓向曙肅仗衛以將引儼
罇壘而不御主上感深守器念極賓天痛玉符之靡召悲
銀榜之空懸詔下臣於信史載盛德於瑤篇其詞曰

於昭我唐誕受帝祉舊邦維新令問不已亦有積慶載生
賢嗣平王之孫吾君之子越在綺紈芳若蘭蓀綠車表慶
寶玉疏恩東平錫壤南昌啟藩耆老諮訪邱墳討論文以
行禮時然後言敬愛表於天性信厚由於自然運屬重熙
地惟明兩古尚達節吾先德讓剖符分陝居東作相封燕

禮縟副戎業廣績著保釐道高寅亮敬亭南屏浙水東馳
是惟關輔以衛京師乃移節鉞建此藩維擇其令典導以
由儀仁薰俗厚化洽風隨國步中艱文身怙亂鎮以高卧
制之長算取彼鯨鯢戮爲京觀吳門載同輿詞協從天之
眷命我豈矜功乃正皇統斯惟至公爰撫軍而監國亦納
揆而登庸業彌盛而學彌廣望益高而禮益恭不言而信
有感則通多壘以之而罷警四門以之而除兇反淳和於
國儉致符瑞於年豐天亦難諶胡寧不惠枉矢流蒼震之
野火耀奄前星之次捨內豎之問安進浮邱而把袂九重

增慟萬邦銜涕冥茫少海之波寂歷洊雷之肆嗚呼哀哉
感神飈之遠至嘆芳歲之云徂違太學之齒冑啟佳城而
下居建采章於綢練儼備物於塗芻經武帳之剡旄據青
龍之鬱紆嗚呼哀哉苦霧閉塗窮陰殺節重雲之旭日如
晦大壑之層冰似雪指京口而不臨背都門而永訣萬目
愁而旆旌慘羣心感而笳簫咽嗚呼哀哉瞻嵯山之落木
聽元圃之迴風臺思子以何極宮長男而遂空集荆門之
故吏會商嶺之悲翁淚淋浪而灑袂氣怨結而盈冑嗚呼
哀哉歷邃古以遐觀考令猷於三善孰仁孝之昭著復功

名之不顯惟筆史與毗頌配長天而日遠寧騁麗於東田
豈較能於文選嗚呼哀哉

齊王贈太弟哀冊文

代喬侍郎

維年月日天策上將軍太師尚書令臨川牧齊王薨於臨
川府之正寢主上追先皇付託之意表叔父遜讓之風乃
下明詔冊贈太弟卽以其年十一月日葬於江州某縣某
鄉廬山之原從理命也綃幕夕陳虞歌曉引改兔園之賓
館設龍樓之桎楯閭靈儀以愈遠窮哀端而靡盡愴永恨
於宸襟俾誕揚於令問其詞曰

皇天眷佑錫唐良輔時惟宗英裔自文祖孝悌敦慤機神
穎悟昔在中興爰當就傅申畫宛水錫茲茅土德望日躋
邦家是毗鉤陳宿衛宮籥攸司於惟淮甸實始皇基導之
以禮董之以威俗賦甘棠之頌人歌樂職之詩運屬繼明
業隆二聖首輯瑞玉來參大政乃爲左相其班上台乃封
夏口其賦千乘赫矣元后烝哉古風不私其子天下爲公
並命叔仲奮茲顯庸或踐我舊藩或陟爾青宮辭不獲命
處之益恭晉鄭之勛推而更融臧札之操久而彌崇若泰
伯之讓異周公之東京江汝水旄節從容皇統旣正靈符

允答國步清謚羣生欣洽復大道於三台永文昭於萬葉
越我嗣君尊尊親親極以呂望之高位崇以貞觀之舊稱
賜書不詔贊拜不名曰予小子實繫叔父維藩維翰宗社
之故永錫難老日新王度謂天蓋高命亦靡常台階隕宿
河月沈光慟東堂之哀臨輟南國之春相與聖賢而共歎
獨天地之何長嗚呼哀哉知生若寄臨凶闕奢於蜃炭舉
士庶而均哀頌聲猷於無間嗚呼哀哉歸虎節於王府靡
鸞旌於雉門閒西園之風月慘緱嶺之煙雲象輅迴兮遵
塗遠歸帷整兮逝水奔賓友散兮霰雪積巾箱故兮經籍

殘嗚呼哀哉身歿壤存道悠運促贈今日之典冊閱當年
之寶玉全大義以經國激清風而被俗昭遺烈於千齡寄
元堂於陵谷嗚呼哀哉

光穆皇后諡冊文

維年月日嗣國主臣某再拜稽首言臣聞體厚德而毋萬
物存乎尊位騰耿光而蕃百世繫乎鴻名繼統廣業莫其
爲重顧惟小子懼忝貽謀對越祖宗敢揚公議伏惟大行
聖尊后姜任顯族皇英茂德作合元聖長發祥符秉婦禮
於儲闈正嬪則於四海孝心天賦惠問川流祚啟重熙尊

歸理內率循陰教欽若皇猷順承利坤元之貞輔佐流周
南之化慈撫公族仁懷六宮清淨廣於真風戒慎刑於外
戚用能永錫繁祉宏濟多難保佑沖人克荷丕緒某仰繫
慈訓方恢景福靈臺告稷永樂長違罔極之懷觸緒荒殞
恭惟尊名節惠之典載考儒臣禮官之稱咸以爲光大孝
悌之懿肅雍賢德之盛昭映前烈垂示無窮列辟承式弗
敢失墜謹奉玉冊琮寶上尊諡曰光穆皇后伏惟威靈如
在鑒茲緝禮延九廟之積慶與二儀而長存嗚呼哀哉謹

言

告天地文

臣以寡昧叨嗣慶基對越上元申養長樂側身恭已靡敢
荒寧而聖尊后自夏秋已來寢膳違豫醫藥備竭禱祠必
至數月於是有加無瘳憂勞之誠不知所措敢陳蠲潔仰
告威靈伏惟精懇上通元恩錫佑哀臣烏烏之志憫臣藥
棘之心使六氣惟和百祥薦降冀於旦夕速就康寧臣內
顧眇躬弗明於道方深慈訓之益欲報劬勞之恩烝烝之
懷區區於是隳瀝肝膽以俟鑒臨

祭世宗皇帝文

稽古靈命造圖伊始聖人既生萬物咸理元功格而高謝
令問垂而不已通玉帛於無外執豆籩而萃止蓋百代之
不易言皇猷之至美恭惟盛德乃聖乃神爰初纘服舊邦
維新瞻顧函夏實始經綸三驅示禮四載彌勤濟之以武
守之以文降鑒回慮全國庇民既戢兵而禁暴或服義以
歸仁功成理定返樸還淳羣賢在位百度惟貞方將致宣
王之薄伐焚老上之龍庭還師衽席檢玉云亭何祝壽之
無感忽綴衣之在辰嗚呼哀哉神祔軒邱化流南國率感
義以孺慕共銜哀而膈臆日月以之匿曜烟雲爲之改色

痛輯瑞之長違恨攀髯而不得嗚呼哀哉永惟下國獲嗣
餘基奉天光而不早順文告以何遲仰霆電之震以警其
失賴陽春之澤以赦其迷既賓禮之加厚亦恩情之過私
大信有千齡之固承歡無再稔之期覽訃書而慟絕捧遺
賜以漣沍嗚呼哀哉集同軌於七月過八音於四海喬山
之冠劍長掩灞涘之川源不改敢薦忠信敬陳脯醢庶有
感而必通願降神而如在

祭文獻太子文

粵惟上天降鑒我李文昭武穆神孫孝子赫矣謨訓昭哉

圖史以濟時屯以永千祀恭惟盛烈仰屬尊靈惟精惟一
克長克君有信厚之風以睦公族有孝敬之德以奉天經
避寵崇讓以正流俗主畱分陝以樹風聲惠下之政爲民
慈父平戎之際爲國長城聳多士之耳目煥萬古之丹青
儲闡旣正鴻猷允塞雖主器而納揆更承顏而養德四海
無波百官成式光昭興運允答靈心宗祊之所託者重蒼
生之所望者深何國步之已泰忽神儀之永沈陽光爲之
而晝晦萬籟爲之而哀吟惟恩信之所洽孰憂傷之可任
某等迹備三千義深凡百或選自朝廷或仰由洋或方

列於宮府或常陪於賓席分曹

之差辱願推

誠無高卑之隔徒歲月以滋深

之靡益今也徒御

分散軒墀閨寂摧傷於望苑之前
絕於華池之側實邦家之不幸
豈臣吏之空惜嗚呼哀哉寢園
斯啟遠日將從儼象輅以帷白
建鸞旗而旒紅聽寂歷以無覩
視杳冥而遂空撫躬弔影涕雨
號風敢寓誠於籩豆庶寫恨於
心胸願賓天之下降鑒永慕之
無窮嗚呼哀哉尚饗

與中書官員祭江學士文

維年月日廣平游簡言隴西李貽業清海張緯東海徐鉉

謹以清酌庶羞之奠敬祭於故翰林學士江公君章之靈
眇眇元造茫茫萬有若明若晦爲天爲壽顏子不幸仲宣
無後豈同槩之能量實令名之不朽惟公之生俊德高名
一日千里三頃五城乃邦之彥乃時之英藹然臺閣存此
風聲惟公之沒音容倏忽二子繼天高堂結髮有女垂髻
摧心裂骨門館秋風階庭夜月哀從中來云誰能遏簡言
固陋夙奉光塵廟朝之舊豈無他人西垣竝入禁署相因
二十年中心同道親會無間墜靡或緇磷貽業不才依仁
仰德晚獲同 凶成近戚形忘累遣情深分密杯酒痛飲

光陰一擲豈料歡遊遽分今昔緯在三川論交早年才力
工拙詞場後先與之聲價借以騰騫徒欣踐迹敢曰差肩
他鄉胥會舊分依然倍成感嘆轉奉周旋鉉實後生幸爲
同族聯事之好友于之睦以道相許以義相勗官路迤邐
天涯遣逐千里關山他鄉心曲自帝里連歸周行並復稅
駕未安捨我何速嗚呼君章魂遊何方非巫陽之可招非
祖洲之可望平時笑語舊日顛狂何夢覺之不識何悲歡
之不常惟四友之分義成終天之感傷雖山公之無託豈
延陵之可忘有肴在御有酒盈觴死生之會終於此堂願

公如在來爲我嘗長號有慟迸淚無行薄奠云畢哀情未
央嗚呼哀哉尚饗

祭韓侍郎文

維開寶三年太歲庚午九月己亥朔七日乙巳東海徐鉉
謹以清酌庶羞之奠昭祭於故中書侍郎贈相國昌黎韓
公之靈天佑下民必生賢人數有治亂道或亨屯君子處
之全名保眞窮不易節達不私身嗚呼明公與道爲鄰其
本也忠其動也仁折而不撓屈而能伸懋此成績揚於王
庭名聞天下道合明君宜若張公上應台星 如衛武享

茲百齡如何不淑與世同塵城郢遺忠感深紫宸黔婁之
衾賜從御府季子之印佩入泉扃知與不知孰無悲辛嗚
呼哀哉某惟不佞早奉光容傾蓋之交繼繼相從公之知
我如我知公何義不協何言不同寧懼觸鱗之忤豈防羸
角之凶先號後笑無初有終霰雪既消陽光乃融海郡山
城幾憐煦沫南宮西掖近見搏風豈主恩之可報幸吾道
之非窮今也歲月遒邁悲歡一空平生氣宇夙苦心曾極
視聽而無所與造化而冥蒙露泣門柳霜凋井桐物感於
外悲來自中生芻表德絮酒申恭願貞魂之降鑒庶丹懇

以斯通

祭王郎中文

維年月日朝議郎行祕書省祕書郎直門下徐鉉謹以庶
羞之奠昭告於故郎中丈人之靈惟公立身行己之規理
職奉公之節聞於士友著在官司今以銜悲豈容繁述伏
思頃歲獨奉深知獲承子妻之道追序通家之舊邕和二
族出入十年情不間於初終義實敦於骨肉去歲天恩舉
善右掖登賢幸以王事僅同省垣不隔陪侍靡違於旦夕
興居常在於見聞雖無光益之期且慰因依之望豈謂悲

歡迭代光景須臾才周旬歲之間奄搆終天之痛追攀靡
及哀慕何窮嗚呼哀哉昨聞訃之初方當卧病不得親臨
易箆躬奉遺言徒掩淚於漳濱但痛心於夜壑嗚呼哀哉
家存餘慶念屬帝心有後之期自符公議不孤之任豈在
他人嗚呼哀哉故國方遙良時未卜王畿寓殯遠日將臨
霧昏而丹旆悠揚日落而總帷蕭索涼風助慘行路同悲
瞻望靈筵酸辛無地敬陳薄奠少道深懷髣髴明靈一賜
臨降尚饗

祭劉司空文

惟靈氣稟沖和志推廉潔白璧蘊孚尹之美朱絃含清越
之音操行純深性克全於天爵襟懷宏遠譽早播於人龍
頃自奮迹清朝策名近侍既保後凋之節終諧貞退之心
道因損而益光名以謙而更著優游自得忠孝歸全求之
古人我復何愧某等幸承事舊况預姻連眷分過私襟期
莫逆歷歲時而彌固經夷險而不回挹淡水以無厭仰高
山而何極今則佳城將啟遠日有期光容有隔於重泉賤
竚聊申於薄奠仰惟貞魄俯鑒丹誠尚饗

欽定全唐文卷八百八十八目錄

徐鍇

奉和送鄧王二十六弟牧宣城詩序

曲臺奏議集序

陳氏書堂記

先聖廟記

義興周將軍廟記

茅山道門威儀鄧先生碑

樂史

僊鵝池祈真觀記

唐景雲觀碑

秦興風解軍佩請

夫聖聖臨時

勅乃書堂寫

曲臺奏新樂歌

奉暉安隆王二十六卷於宣陽殿

余識

欽定全唐文卷八百八十八

欽定全唐文卷八百八十八

徐鍇

鍇字楚金與兄鉉齊名事南唐嗣主為祕書郎授右拾遺
集賢殿直學士忤權要以祕書郎分司東都復召為虞部
員外郎後主立遷屯田郎知制誥集賢殿學士及貶制度
改拜右內史舍人兼兵吏部選事開寶七年卒年五十五
贈禮部侍郎諡曰文

奉和送鄧王二十六弟牧宣城詩序

敦牂御歲募收宰時鄧王受詔鎮於宣城之地離宴既畢

推轂將行時也宵露未晞涼月幾望苑柳殘暑宮槐半晴
滄波起乎掖池零雨被於秋草皇上以敦睦之至聽政之
餘逍遙大庭顧望川陸理化風物詠謝安高興之詩登山
臨水嗟騷人送歸之景暫軼征軸宴於西清蓋所以申棣
萼之至恩徵文章之盛會也絲簧輟奏惟擲地之鏘然組
繡不陳見麗天之煥若將使宗英臨務知理俗之以文朝
宰承恩識太平之多暇然則明明作則敦敘之德無疆濟
濟維莖八輔之功何已有詔在席進敘及詩下臣不敏職
當奉詔謹賦詩如左八十八

曲臺奏議集序

三代之文既遠兩漢之風不振懷芬敷者聯袂韻音響者
比肩于虛文麗用寡而末世學者以為稱首兩京文過其
心後之才士企而望之嗟夫為文而造情污準而粉纈若
夫有斐君子含章可正和順積中而英華發外周旋俯仰
金石之度彰擗簡下筆鸞鳳之文奮必有其質乃為之文
其積習歟何其寡也有能一日用其本者文遠乎哉我欲
仁斯仁至矣潁川陳表用今為晉安人也徧讀七經九明
三禮蟠極造化之說升降損益之文徙之不煩於輜車蓄

之殫盈於腹笥發爲詞令文之本歟昔之自遠而至者陸
機以詞章言譙秀以隱論顯况以禮律者動足之蹊徑幹
局者爲政之權衡自入朝爲太常博士八年動而不阿靜
以有守議之所及書辭無頗禮者所疑援經以對酌於古
而無悖施於今而易行君雖急賢位未充量道有悠久豈
終否哉觀其條奏簡墨之文探索比詳之說證古者不許
救時者不諛簡而周約而舉信守官之善作伸道之名言
知余直筆訪余爲序保大丙辰歲六月一日於集賢序之
屯田郎中知制誥徐鉉述

陳氏書堂記

古之學者家有塾黨有庠術有序國有學此繫乎人者也
聖王之處士也就閒燕孟母之訓子也擇鄰居元豹隱南
山而成文章成連適東海而移情性此繫乎地者也然則
稽合同異別是與非者地不如人陶鈞氣質漸潤心靈者
人不若地學者察此可以有意於居矣潯陽廬山之陽有
陳氏書樓其先蓋陳宜都王叔明之後曰兼爲祕書少監
生京給事中以從子褒爲嗣至鹽官令生瓘至高安縣丞
其孫避難於泉州之仙遊生伯宣著史記今行於世昔馬

總嘗左遷泉州與之友善總移南康伯宣因來居廬山遂
占籍於德安之太平鄉常樂里合族同處迨今千人室無
私財廚無異爨長幼男女以屬會食日出從事不畜僕夫
隸馬大順中崇爲江州長史乾寧中崇弟勛爲蒲圻令次
弟孜本縣令能嗣其業如是百年勛從子哀本州曹掾我
唐烈祖中興之際詔復除而表揭之旌其義也哀以爲族
旣庶矣居旣睦矣當禮樂以固之詩書以文之遂於居之
左二十里曰東佳因勝據奇是卜是築爲書樓堂廡數十
間聚書數千卷田二十頃以爲游學之資子弟之秀者弱

冠以上皆就學焉自龍紀以降崇之子說從子渤族子乘
登進士第近有蔚文尤出焉曰遜曰範皆隨計矣四方遊
學者自曰蔚文而名立蓋有之於戲文如麻菽求焉斯至
道如江海酌焉滿腹學如不及仁遠乎哉昔北海有邴鄭
之風離騷有江山之助者皆古也門生前進士章谷嘗所
肄示筆而見告思爲之碣會陳氏之令子曰恭自南昌掾
入仕至都下因來告別援翰以授之時太歲己巳十一月
九日記

先聖廟記

昔夫子稟天地之靈膺期運之數體山岳之成形合堯禹之宏度跨三五以傑出邈千載而高步豈惟民哉泰山之於邱垤鳳凰之於飛鳥也然而日月有薄蝕之運生民有淪胥之期老聃已逝蹈流沙而不返文王既沒顧天下而誰宗是以則天以化民屈已以濟物使夫子志在於爲君也則當假道百里因基一成受祿以有民逆取而順守然後革命創物錫土苴茅布子姓於九州班正朔於四裔因王法以行禮假號令以濟人然而不屑意者以爲堯湯旣遠武有慚德樂則有司失其傳禮則孟孫病其儀風俗崩

弛皇綱解散是以周流天下遑遑列國一車二豎疑訪萇

宏而觀周廟四科十哲昭日月而播微言假陪臣以尊周
公修春秋而正王室匡輔元精陶冶情性因國風而正樂
順人情而定禮萬物既治我無位焉此則夫子所受老子
之元言老子所以釋負而去之之義也至夫載贄諸境濡
足當時止璠璣而救季孫斬侏儒而存魯國故令君臣懸
解井樹不刊而地靡立錐權輕飛羽諭醢雞於道室譬喪
狗於東門野餉弗糝門徒菜色坐席不煖炊突不黔其利
物也甚豐六為已也至約是以子貢有言夫子賢於堯舜

遠矣豈不謂然乎夫近道者之近之遠道者道亦遠之
是以七國冰解嬴秦灰滅所以夫子欲見於衛妃諸生發
憤於陳涉有由然矣漢高甚武心涵帝度爲舊君而袒哭
望魯國而輟攻受天明命將半周室其遺言祠祀也則自
闕里而徧寰區出壁中而寶東序蓋帝王之崛起大數之
中興焉夫子非求祀於人而人皆祀之非銜書於人而人
爭售之自非大庇生民其孰能至於此聖歷中否羣雄大
馳衣冠禮樂不絕如綫聖皇紹祚文思累洽掃大學之煨
燼編羽陵之蠹簡濟濟焉煌煌焉民德歸厚矣猶慮隈隅

未潤蓬艾未光慎彼觀風敬茲有土保大壬子歲以樞密
院副使兼尚書吏部郎中李君徵古有幃幄之効克定之
謀俾守於袁下車視事解甲息兵巡省農功周行廬室以
爲導化有本振葉由以孔廟頽替誦堂風雨顧禮器而
赧慙振儒衣而淒泣於是攷圖牒徵碑版蓋天寶中太守
房公瑄始立廟於州城北門之外五十步乾元中太守鄭
公審始移之會昌中又遷於州東大中中復於房公之卜
不常厥所於今四遷乃永奠陔次大興力役糞牆俱墁非
宰我之難朽壞屋可炊知顏生之不惑迴廊月照接武雲

征洞戶靜深重簷奄靄徵兩楹而正坐儼四科而列侍如
嘗不寢似欲無言植以美材絳以藻泳靈衣兮披披華藻
兮藁藁黍稷令芳籩豆普淖解危冠於季路見繪事於卜
商足以目擊而道存不言而心喻矣昔魯恭壞宅於舊國
廬陵伐木於孔門金石爲鳴父老歎息然則夫子之道得
其人而後行文翁之風感於心而自化是以袁江之上袁
山之阿朝爲崆峒夕成洙泗用此道也若夫敷孔業而無
祠宇是猶棄筌蹄而待貌叩寂寞而求音盛趨翔而無至
心是猶依猿狙爲周公假詩禮而發冢也是以李君炳筠

川之靈錫鍾陵之秀行出鄉里名聞京師題橋以起途懷
綬而返國昔之去國而衣錦者蘇秦無守土之實終軍無
表里之名君之兼總其稽古之謂故分符之際勅改君筠
州萬載縣所居高侯鄉高城里曰懷舊鄉孕秀里君又以
私財百萬代其鄉輸稅增閭里之氣爲儒者之華功成不
居無待刊紀而庠序之作所以聳善懲惡託予敘述吾師
也故爲之記至其遏寇虐浚溝湟則有底績之司書勲之
府焉唐保大癸丑歲正月二十日廟成之日也

義興周將軍廟記

君字子隱義興陽羨人晉鄱陽太守魴之子少而跡弛任
俠自處不護細行鄉人以為暴焉嘗感父老之言以南山
之虎長橋之蛟并已為三害於是入山殺獸既而搏蛟浮
沈三日竟斷之而出初里人以為君之沒也室家相慶既
出始知人患已之深也乃入吳尋二陸而師之學成義立
以忠烈自處暮年而州府交辟嗟夫觀過知仁則向之所
為非巨惡矣吳末為無難督及王渾平吳置酒高會調吳
人曰諸君亡國之餘得無戚乎君曰漢室分崩三方鼎足
魏滅於前吳亡於後亡國之戚豈獨一人渾有慚色荆楚

之烈氣凌太原兵滅之餘折而不撓以爲廣平太守積紀
滯訟決之一朝君之果也於從政乎何有以母疾罷歸爲
楚內史徵拜散騎常侍君曰古人辭大不辭小乃先之楚
化行俗易然後從徵及居近侍多所規諷遷御史中丞糾
劾不避寵戚梁王彤違法君深文按之齊萬年反權臣惡
君之強直以君討之移孝於忠有死無二賊策之曰周君
才兼文武若專斷吾來不可當也如受制於人此成擒耳
嗚乎盜有道焉其知之矣及六陌之役梁王爲帥軍人未
食彤促令進而絕其後繼君自知必敗賦詩曰去去世事

已策馬觀西戎藜藿甘梁黍期之克令終言畢而戰白旦
至暮斬首萬計弦絕矢盡而援不至左右勸之退君以爲
鑿門而出義不旋踵遂歿焉大梁王以宗戚之貴義兼家
邦非不知良材爲國之所憑蓋利欲之誘深而愛國之情
淺也而况悠悠羣品安足言哉由是而言君之所按非深
文也夫奸臣之與直士其不合有三佞直不同嗜好亦異
一也邪正相形才望相絕雖欲企尚不能效之撫心內愧
遂成讎惡二也以小人之怙度君子之心以爲善人之進
必來排已三也有此三者至於反兵賢人旣殞遂及於國

夫剖巢破卵鳳凰不翔殺犖損犢聖人亦逝將軍旣歿此
西晉之所以淪胥也二子繼德此東晉之所以光啟也君
旣除害鄉里稱之又嘗著陽羨風土記則精靈所留遊盼
有在矣錯以癸亥奉詔爲祠官東禱山嶽厯將軍之廟貌
想先賢之高風周旋徜徉欲去不忍惟君之見危授命當
官必理雖百代之王者願以爲臣焉郡縣旣以時致祀敢
卽其圖像而爲頌曰

深山大澤實生龍蛇左湖右瀆君子之家烈烈周君國之
爪牙梁摧國圯命也如何越在童齠所游非類見善則遷

過而無遂眈眈白額擇肉朱殷矯矯長蛟噴沫飛涎摧斑
碎掌潤草丹川無文曷行不學將落裏足時彥見機而作
學成德備敷我王庭所居成政所歷傳名敏而應敵正以
持傾亦旣霜臺糾斯強禦自親及疎何吐何茹翩彼權倖
假國之威妒賢醜正言遂其私取彼賢人委之豺虎君實
致身曾無二慮恭聞仙誥惟忠是與仰料將軍解形而去
遼東千歲歸鶴來翔威加四海魂魄還鄉矧茲蘋藻在渚
之陽斯文曷補實德無疆

茅山道門威儀鄧先生碑

原夫性與天道夫子祕而不言神之格思詩人謂之難度
况乎窮幽極奧鍊氣陶形而庸庸之徒交臂於遺金爽口
於緣鵠涂窮於缺鬢智極於轉丸奔馳莫逢視聽莫見眞
人隱而下士笑者又焉足怪乎宏之在人可得而言矣故
茅山道門威儀鄧君啟霞字雲叟其先南陽人今爲丹陽
金壇人也開元時有鄧天師者道簡上聖屈乎下風光國
垂勛隱景遁化君卽其後也祖諱文考諱章皆不仕君性
理和敬神識宏深咸通元年始詣茅山太平觀柏尊師道
泉爲弟子方羈卅六年乃披度爲道士十二年詣龍虎山

十九代天師參授都功正一法籙乾符三年詣本觀三洞
法師何先生元通進授中盟上清法籙何卽桃源黃先生
洞元之弟子也與瞿仙童爲同學之友焉其源流隱顯著
自前聞固非末學所能談悉天祐四年吳太祖旌別元異
始加簡署尋爲本山道副九年爲山門威儀再賜紫服華
陽洞天仙聖游集太平觀卽太宗文皇帝爲昇真先生之
所立也雖神真所處杳以靜深而外迹繫時與之崇替中
和之際寇盜星馳人力所爲翦焉將燼世之後學無所式
瞻君誓高日月誠貫金石周流勸諭力與志并人物感其

精誠神明助其尋度荆棘隕穉並爲芝丹鳴臬革音復見
鸞鶴像設嚴砵垣楹輪奐其所經始三百餘間山樓所須
田疇帑庾什器等率皆稱是夫紫蓋兆於建業茅山連於
金陵君之纘修靈境光復而有唐中興之業亦自此而基
神理幽通不期而會者矣義祖武皇帝作鎮江表特加禮
異至誠所啟罔有不從是以力役復蠲樵蘇有禁梁懷王
藩屏淞右親圖寫其像焉君旣拱此元珠輕其尺璧內以
宏道外以成人貞素先生王君理解清深牆宇高嶷未嘗
不攝齊捧袂虛往實歸舒其憤悱致於夷曠偏得其道以

居京師君於世學多所精詣體此敏博沖而用之旣居其實而去其華養其內而遺其外故不復爲稱矣夫流光迅馳道俗同在若竝轡半嶺而升降則殊及夫百齡有窮萬物將蛻衆自此淪厭君自此躋升真俗之間由是而判幽冥恍惚昧者不知春秋八十有五太和四年歲在壬辰解化於山門君所傳經籙昭顯於時則故元博大師真素先生王君棲霞惠和大師康君可久茅山威儀王君敬真麻姑山威儀王君體仁表歎大德賜紫安君光美左街焚修大德張混成廬山道副重安寂竝被國寵翊於道風入室

弟子故太平觀都監陳修一陳守一今茅山都監主教門
事表歎大德鄧棲一監觀倪宏一等竝隨其性習間參道
要山門教字棲一有其勞君遺世雖遙貞石猶缺真迹未
勒門人懼焉錯之蒙淺雖晚聞道昔嘗逮奉貞素伏申之
敬貞素之上清門人今右街章表大德劉君德光爲啟霞
之友鄧君棲一因而見托故錯不爲讓焉其銘曰

大道汎兮物無不在人代有敝真風無改於鑠鄧君情遺
所宰惟道是求惟道是采脫落畎畝超登雲海天作茅峯
人作垝壩君始從師逸而功倍教法遙邈君能復之一匡

輪迹允洽昌期君既往矣誰能嗣之弟子棲一承茲道基
敬仰高風刻石為碑俾爾後學高山仰之

樂史

史字子正撫州宜黃人仕南唐官祕書郎入宋太平興國
五年復登進士歷水部員外郎使兩浙巡撫判西京留司

御史臺卒

僊鵝池祈真觀記

崇仁縣古巴陵之府隋開中降為縣縣之西北有祈真
觀者山水迴合實列仙之攸館歲月電謝碑石罹於兵火

置觀之由不吾知也其所聞者耳目相接傳云太和年中
住持道士杜仙興嚼玉蕤嗽金髓燒五色藥望三素雲本
郡杜使君師仁聞其名就觀修黃籙齋忽存仙鵝七隻下
門外池中因是名曰仙鵝池逮仙興羽化僊磬響沈玉宇
琳房鞠爲茂草至保大初有道士劉道肱者亦精嚴法籙
之流耳言慕幽迹賁然來思繇是斤斧雲峯放出杉松曾
不崇朝化爲靈宮紫篁清節一皆新之噫能拂淒涼之地
重爲朝禮之庭若非修道之輩孰至是哉悲夫自太和中
至乾德初約四百十載而仙鵝一去池樹毳毳晴山似畫

著水如藍非靈羽有不願之心蓋人世無至誠之感乾德
元年歲終癸亥四月彭城劉司直元載字簡能好奇之名
士也製錦是邑詢故事得仙鵝之實翌日焚香覬靈禽之
來願言之抱如影隨形是月十八日有仙鵝二百餘隻萃
於觀之松篁一鵝殊偉若蜂蟻之有王皆玉衿絳趾丹觜
霜翎不飲不啄宿而後飛二之年四月二十三日三之年
四月二十八日有百餘隻而至於時五月初二忽羣飛於
縣邑盤旋久之如留戀焉是歲劉君自南宮承制經於舊
邑稅駕祈真東之佛舍明日有仙鵝五十隻於池南自茲

一去又隔三年迨開寶三載歲在庚午四月十九日有仙
鵝三十隻現於池北於當月二十五日又百餘隻過於郊
郭時扶風馬司空憲絃歌此邑馬君湘潭玉葉好事之君
子也亦嘗命駕祈真祈禱真迹果一月中仙禽兩現余家
於邑中熟諳本末已曾爲簡能撰仙鵝記甚得詳悉今請
告南歸道肱又以觀記見請不可不重道仙鵝之來去矣
昔杜師住之日仙鵝少今劉師住之日仙鵝多由此而論
劉之道緣優於杜也又念巴水之地名迹實繁自觀之東
抵縣縣有景雲觀則蕭子雲侍郎書牌額之所觀東北接

五峯山山前有百鳥湯觀之北近高富山山前有過至孝墓予惜其少於傳記恐隙駟不留將來之人不得知矣今染翰之次得以叢而附焉甚愧不文直書其事云耳

唐景雲觀碑

景雲觀者皇唐景雲年中所建也在崇仁縣西北隅巴山翠其檻巴水漱其門山水周遮松蘿堆擬士君子賞為神仙之勝跡斯言不誣矣予家於觀之北童稚時聞耆老傳云往時觀碑額故將新之因中元節眾道士推能書者明日染翰是日晚有一道士形容羸衣褐荒栖栖焉人皆不

物色自言攻篆隸請書之眾口鞭然而阻截迨夜參半其
道士於堂中張燈火動筆硯太書門扉上景雲觀三字有
未睡者潛觀焉遲明觀其筆力道健光彩射人目於時令
佐至嘆訝者數四雖覺異人發問未暇請於新碑更書之
而辭不能也齋罷告行行至三門令佐暨諸道士隨而且
留自言曰吾是蕭子雲眾拜之舉首不見於是圻其門扉
緣飾爲碑至危太傅全諷爲川將時人移於黃田寨上失
之得非神仙之物容易而難留子雲者梁黃門侍郎於玉
笥山得仙矣先有大鐘一牌額離後一夕風雨亡異時捕

魚人見在觀南溪潭中取之不獲今有小鐘一存上題開元二十七年鑄又有香爐一上題許真君名號傳云真君化身來捨歲月將永事不可尋今雖已亡又不可不存其梗槩觀之屋宇自黃巢攘臂之際已赴灰燼今堂殿樓臺尚殘基址因知昔時締構壯麗不無洎後雖曾完葺具體而微一片衡茅四時風雨王孫之草幾犯於階庭金母之桃半歸於樵採顯德年中彭城劉司直元載慕道之高士也宰是邑惜其名迹無人尸之乃召請道士蔣道元者住持道元門傳金籙力學玉書不以艱難破其心不以荒涼

役其意一味焚修俟其振發予昨自班行南歸故園每行
樂於觀之溪岸道元以觀中元無碑記便以斯文見請且
曰恐神仙之踪跡不聞於後人矣予聞斯言意甚嘉賞况
居近仙館素欲揮翰今既會宿心得以直書其事乃為銘

曰

巴山四瞰巴水東流景雲觀者在巴水頭景雲年立仙境
最尤有蕭子雲本梁公侯把琉璃盃上鳳麟洲鳳麟為駕
駕言出遊觀額將故道士云修遇我蕭侯書蹤夜留組繡
光動龍蛇勢浮鳥啼花落歲月悠悠便一銀鈎雁亂誰收

空餘古觀松蘿一邱松風瀏瀏松雨颼颼古鐘尚存仙爐
亦休道士好事恐墮其由請我揮翰金石千秋

景大育蕭子雲本祭公刻碑在衡山土風部

巴水風景

巴水風景

巴水風景

巴水風景

巴水風景

巴水風景

欽定全唐文卷八百八十九目錄

王宗佶

上蜀高祖表

王宗儔

李延召投狀乞免役事佛判

馮涓

爲蜀王建草斬陳敬瑄田令孜表

諫伐李茂貞疏

諫用兵疏

韋莊

乞追賜李賀皇甫松等進士及第奏

為蜀高祖答王宗綰書

又元集序

韋諷

王宗浣花集序

吳崇

王宗重修開元天寶觀記

周德權

上蜀高祖勸進表

李道安

上災異疏

林罕

林氏字源編小說序

十在文

許寂

上蜀主求賢書

謝信物書

蜀答聘書

上蜀王表賀書

書

平立文

林父字殿麟小字

林

七災異紀

李

上蜀高祖

欽定全唐文卷八百八十九

王宗佶

宗佶本姓甘氏洪州人蜀先主王建養子以軍功累遷武
信軍節度使天復初充扈駕指揮使進太師封晉國公後
爲樞密使唐道襲所構先主命撲殺之

王宗佶上蜀高祖表

臣官預大臣親則長子國家之事休戚是同今儲貳未定
必生厲階陛下若以宗懿才堪繼承宜早行冊禮以臣爲
元帥兼總六軍倘以時方艱難宗懿冲幼臣安敢持謙不

當重事陛下既正位南面軍旅之事宜委之臣下臣請開
元帥府鑄六軍印征戍徵發臣悉專行太子視膳於晨昏
微臣握兵於環衛萬世基業惟陛下裁之

王宗儔

蜀高祖末

宗儔蜀先王建養子累授天雄軍節度使兼侍中乾德
三年擢山南節度使充西北面都招討行營安撫使以後
主王衍荒淫憂憤卒

王山李延召投狀乞免役事佛判

雖居兵籍心在佛門修心於行伍之間達理於幻泡之外

歸心而依佛化截足以事空王壯哉貔貅何太猛利大願
難阻真誠可嘉准狀付本軍除落名氏仍差虞候監截一
足訖送真元寺收管灑掃焚修

馮涓涓字信之婺州東陽人登大中四年宏辭科進士起家京
兆府參軍昭宗時官祠部郎中擢眉州刺史蜀主分藩西
川表爲節度判官厯官至御史大夫卒

爲蜀王建草斬陳敬瑄田令孜表

開匣出虎孔宣父不責他人當路斬蛇孫叔敖非因利已

專殺不行於閩外先機恐失於穀中臣輒行閩制處斬訖
諫伐李茂貞疏

臣聞興師者殘兵力虛府庫弊羣畜損弓甲衰農桑動德
義興詐偽故損國害人莫先於用兵也方今梁王朱全忠
霸盛強據兩京料其先取河東河東梁之敵國也勢不兩
立儻一處爲雄率天下之眾一舉西來縱諸葛重生五丁
復出無以泥封大散石鑱劍門今秦庭實蜀之巨屏也去
其屏窺見庭館焉莫若與秦王和親稍稍以麻布茗草給
之不傷於大義濟之以小利蜀但訓兵秣馬因敵料強足

可以保天祿於三川固子孫於萬葉潛令公主探其機密
窺彼室家俟便攻之一舉而獲可也

諫用兵疏

古之用兵非以逞威暴而肆殺戮蓋以安民爲先豐財爲
本湯武無忿怒之師高光有魚水之士故能應天順人弔
民伐罪今自土德云衰朱梁逞虐雍都洛邑盡是荆榛江
南山東各有割據鬪力則人各有力用兵則人各有兵陛
下欲以一方之強舉萬全之策臣恐陛下之憂不在於秦
雍而在於肘腋之下也

韋莊

莊字端己見素之後乾寧中登進士第爲判官擢左補闕
蜀主爲西川節度副使昭宗命莊宣諭兩川遂畱蜀掌書
記尋擢居舍人爲安撫副使蜀主開國進左散騎常侍
判中書門下事累官至門下侍郎吏部尚書同平章事武
成三年卒諡文靖

乞追賜李賀皇甫松等進士及第奏

詞人才子時有遺賢不霑一命於聖明沒作千年之恨骨
據臣所知則有李賀皇甫松李羣玉陸龜蒙趙光遠溫庭

筠劉德仁陸逵傅錫平曾賈島劉稚珪羅鄴方干俱無顯
遇皆有奇才麗句清詞徧在詞人之口銜冤抱恨竟爲冥
路之塵伏望追賜進士及第各贈補闕拾遺見存惟羅隱
一人亦乞特賜科名錄升三級便以特勅顯示優恩俾使
已升冤人皆霑聖澤後來學者更勵文風

爲蜀高祖答王宗綰書

吾蒙主上恩有年矣衣襟之上宸翰如新墨詔之中淚痕
猶在犬馬尚能報主而況人之臣子乎自去年三月東還
連貢二十表而絕無一使之報天地阻隔叫呼何及聞上

至穀水臣僚及宮僚千餘人皆爲汴州所害至洛果遭弑
逆自聞此詔五內糜潰方枕戈待旦思爲主上報讐今使
來不知以何宣告

又元集序

謝元暉文集盈編止誦澄江之句曹子建詩名冠古惟吟
清夜之篇是知美稼千箱兩歧綦少繁絃九變大獲殊稀
入華林而珠樹非多閱眾籟而紫簫惟一所以擷芳林下
拾翠巖邊沙之汰之始辨辟寒之寶載雕載琢方成瑚璉
之珍故知頷下採珠難求十斛管中窺豹但取一斑自國

朝大手名人以至今之作者或百篇之內時紀一章或全集之中微微數首但掇其清詞麗句錄在西齋莫窮其巨派洪瀾任歸東海總共記得者才子一百五十人誦得者名詩三百首長樂暇日陋巷窮時聊撼膝以書紳匪攢心而就簡蓋詩中鼓吹名下笙簧擊鳧氏之鐘霜清日觀淬雷公之劍影動星津雲間分合璧之光海上運摩天之翅奪造化而雷雲噴湧役鬼神而風雨奔馳但思其食馬雷肝徒云染指豈慮其烹魚去乙或至傷鱗自慙乎龜腹易盈非嗜其熊蹯獨美然則律者旣採繁者是除何知黑白

之鶯強識淄澠之水左太冲十年三賦未必無瑕劉穆之
一日百函焉能盡麗是知班張屈宋亦有蕪辭沈謝應劉
猶多累句雖遺妍可惜而備載斯難亦由執斧伐山止求
嘉木挈瓶赴海但汲甘泉等同於風月烟花各是其櫛梨
橘柚昔姚合所撰極元集一卷傳於當代已盡精微今更
採其元者勒成又元集三卷記方流而目眩閱麗水而神
疲魚兔雖存筌蹄是棄所以金盤飲露惟採沆瀣之精花
界食珍但享醍醐之味非獨資於短見亦可貽於後昆採
實去華俟諸來者光化三年七月二日前左補闕韋莊述

韋藹

藹前蜀韋莊弟

浣花集敘

余家之兄莊自庚子亂離前凡著歌詩文章數十通屬兵
火迭興簡編俱墜惟餘口誦者所存無幾爾後流離漂泛
寓目緣情子期懷舊之辭王粲傷時之製或離羣軫慮或
反袂興悲四愁九愁之文一詠一觴之作迄於癸亥歲又
綴僅千餘首庚申夏自中諫

闕四字

辛酉春應聘爲西蜀奏

記明年浣花溪尋得杜工部舊址雖蕪沒已久而柱砥猶

存因命芟夷結茅爲一室蓋欲思其人而完其廬非敢廣
其基構耳藹便因閒日錄兄之藁草中或默記於吟詠者
次爲五卷目之曰浣花集亦杜陵所居之義也餘今之所
製則俟爲別錄用繼於右時癸亥年六月九日藹集

吳崇

崇前蜀乾德時人

重修開元天寶觀記

原夫混茫無象生元氣以發揚太極成形建兩儀而交感
是故一升一降旣慘旣舒深如要妙之門默起自然之理

萬化皆歸於橐籥八風尋運於璇璣雖開闔紫宸實分官
於九府而主張玉籍俱命職於羣真洎周朝則教演五千
流唐室則宗分前後所以法天取則帝王崇至靜之源秉
一成功冠褐慕至和之境得之者壽失之者亡義軒冀表
於前芳茅許將傳於故事上齋雲宮月殿熒煌高鎖於三
清下則瓊室珠房重疊旁分於五嶽權福罪則皆同影響
叩希夷則莫睹樞機然後九有延祈故崇宮廟三元禮醮
遍列壇場苟邦國以長興諒焚修而不泯其謂乎開元觀
者城東異境物外靈蹤實乾坤秀麗之鄉乃雲鶴盤旋之

地當吳大帝龍驤碧漢鵲起金陵奉元元而旦夕未皇執
蹀靜而禱祈不倦訪鼎湖之舊迹尋河上之元風儻尚虛
無必開虔奉至寶鼎四載乃方立爲崇眞之觀初標堂宇
繼設住持綿星紀以逾深存香燈而不闕值隋皇革命神
器移天方當在宥之初遽布維新之政開皇十一年又換
元額爲崇僊之觀遇大唐高祖皇帝應天徇物捲衆臨戎
定山河爲一統之宗使區宇絕三分之勢明明表德蕩蕩
垂風及元宗皇帝躬乘大寶克顯丕圖復會僊師同訪桂
花宮裏潛逢聖祖還遊羊角烟中萬年以表於殊風四海

仍新於大號開元二十六年又奉更改則今之名額也崇
基宛若真像豁如以次薰修遞相嚴敬有道士彭法宣等
各懷道德繼備精虔表方隅歸向之場顯塵世祈求之旨
及乎咸通已後玉關據虎金革犯秦經兵火以延焚因毀
殘而廢墜暨皇唐復霸帝業中興刺史張公承傑心懸妙
理志慕真筌洞鑒精虔深委功績至保大九年相次捨置
三清尊殿功德寶壇等志堅有感德邁皆通是表良因用
成其事由是散求郢匠廣布楚材梁棟雲鋪棼橑鱗次殿
堂纔畢巍巍籠紺霧細霞廊廡方開赫赫布祥光瑞色真

容聖像儼若化來玉女仙童忽如降下黼黻而皆成異境
清虛而盡似仙鄉芬芳之琪樹祥花繚繞之松陰桂影疑
十洲之風月移在人間眺萬洞之烟霞宛如象外矧以前
臨大道紅塵不惹於元關後跨長江淥浪同舍於妙性八
海之羽人頻至五山之詞客如歸豈讓丹邱何殊閨苑將
期立績冀倬厥功上可以裨贊皇圖下可以休禎庶類而
崇智乏精通才非敏速忝承來命請紀殊猷立言慙裒貶
之文握筆絕色絲之字冀遷陵谷用表貞珉長爲不朽之
名永作無窮之譽時乾德二年太歲甲子十月十五日記

周德權

德權許州人。事蜀主爲眉州刺史。累遷太保中書令。永平元年卒。贈太師。

上蜀高祖勸進表

案讖文李祐西王逢吉昌土德兌興丹莫當李祐者唐亡也。西王者王氏興於西方也。逢吉昌者逢字如殿下之名也。土德坤維也。兌興亦西方也。丹莫當者丹朱也。言朱梁不敢與殿下抗也。願稽合天命仰膺寶籙使天地有主人神有依。

李道安

道安蜀乾德時人

上災異疏

倉廩者國之本糧食者人之命固其本則邦寧重其命則人富今粒食中皆生蜂蠆切疑在位貪鄙奪民農時戕害人命故天生災異以為警告又蟲皆曳米而行恐邊鄙不寧干戈忽起饋挽相繼人不堪命伏願少精聖慮與大臣恐懼修省以消災異

林罕

罕字仲緘西江人事蜀後主除溫江主簿遷太子洗馬

林氏字源編小說序

罕長興二年歲在戊子時年三十有五疾病踰時閒坐思書之點畫莫知所以乃搜閱今古篆隸始見源由旋觀近代以來篆隸多失始則茫乎不知終則惜其錯誤欲求端正將示同人病間有事其志不遂至明德二年乙未復病迄於丁酉冬不瘳病中無事得遂前志與大理少卿趙崇祚討論成一家之書昔孔安國尚書序云古者伏羲氏之王天下也始畫八卦造書契以代結繩之政由是文籍生

焉賈耽鎮滑州時作偏傍字源序云降及夏殷周通謂之
古文至宣王太史史籀著大篆十五篇與古文小異七國
分裂篆與古文隨其所尚始皇兼并海內丞相李斯遂收
拾遺逸作蒼頡七章中車府令趙高作爰歷七章太史胡
毋敬作博學七章竝約籀文篆體轉工世卽謂之小篆屬
秦政滋煩人趨簡易故軍正程邈變古文字大小篆作隸書
然書之所興莫定何代隸之所起始自秦時篆者取蟲篆
之形隸者便徒隸之用漢初有書師以隸合小篆爲五十
五章教於鄉里平帝元始中徵通書會京師者百有餘人

方立小學之科揚雄採掇其可用者作訓纂八十九章至
東漢班固加十三章共一百二章二千一百二十字雖羣
書竝載而目錄不分惟太尉祭酒許慎取其形類作偏傍
條例十五卷名之曰說文頗有遺漏呂忱又作字林五卷
以補其闕洎三國之後歷晉魏陳隋書甚行篆書殆將泯
滅至唐將作少監李陽冰就許氏說文復加刊正作三十
卷今之所行者是也其時復於說文篆字下便以隸書照
之名曰字統開元中以隸體不定復於隸書字統下錄篆
文作四十卷名曰開元文字自此隸體始定矣兼改古文

尚書及無平不陂字卽其類也先已有九經音義及切韻
玉篇行焉大厯中司業張參作五經文字三卷凡一百六
十部其序畧云以類相從務以易了不必舊訣自非經典
文義之所在雖切於時畧不集錄以明爲經不爲字也開
成中唐元度以五經文字有所不載復作新加九經字樣
一卷凡七十六部其序畧云有偏傍上下本所無者纂爲
雜辨部以統之然九經所有之字卽加訓切况是隸書莫
知篆意其字注解或云說文者卽前來兩說文也或云石
經者卽蔡邕於國學所立石經也或云隸省者卽隸減也

中石經乃蔡邕之故事也周禮保氏掌養國子以道教
之六言謂象形指事會意諧聲轉注假借六者造字之本
也篆雖一體而隸變數般篆隸卽興訛舛相錯非究於篆
無由曉隸六書者非止著一意而屬一字一字之內有占
六書二三四者大都造字皆包含六意字有正者倒者橫
而在上中下者豎而在左右中者向者背者竝者重者順
者逆者左者右者俯者仰者橫拆而裏別字者豎開而夾
別字者有一字成者有全二字三字四字五字合成者有
省二字三字四字合成者隸書有不拋篆者有全違篆者

有減篆者有添篆者有篆隸同文者在篆體則可辨變隸體則多有義異而文同篆亦有之今悉解之於後文此不同例俗有隸書賦者假託許慎爲名頗乖經史據顏氏家訓云斯實陶先生弟子杜道士所爲大誤時俗吾家子孫不得收寫又有古今隸書端字決疑賦更不經於隸書賦當今之世不可學之又有文下作子爲學更旁作生爲蘇凡數十百字謂之野書唐有勅文明加禁斷今往往見之亦不可輒學顏真卿撰干祿字書一卷每一字作三般卽注云上正中通下俗旣合標題合有褒貶全無與奪亦無

取焉其道書鬼書天篆章草八分飛白破體行書無益於
字此亦不錄篆隸有筆力適健字勢妍麗斯乃意巧之人
臨文改易或參差之長短之屈曲之拗捩之不奇怪以
媚一時後習之人性有利鈍致與元篆隸一同蓋病由此
起今之學者但能明知八法洞曉六書道理既全體格自
貴亦何必踵歐虞褚柳之惑亂哉罕今所篆者則取李陽
冰重定說文所隸者則取開元文字雖知魯鈍不失源流
所貴講說皆有依憑點畫自無差誤杜征南注左氏春秋
以經雜傳謂之集解何都尉論語序云今集諸家之善亦

謂之集解罕以隸書解於篆字之下故效之亦曰集解今以說文浩大備載羣言卷軸煩多卒難尋究翻致情亂莫知指歸是以翦截浮辭撮其機要於偏傍五百四十一字各隨字訓釋或有字關起字者省而難辨者須見篆方曉隸者雖在注中亦先篆後隸各隨所部載而明之其餘形聲易會不關造字者則畧而不論其篆文下及注中易字便以隸書爲音如稍難者則紐以四聲四聲不足乃加切韻使學者簡而易從渙然冰釋於說文中已十得其八九矣名之曰林氏字源編小說古人窮困湮厄而述作興罕

也卧疾數年飽食終日思有開悟貽厥將來非欲獨藏私
家實冀徧之天下乃手書刻石期以不朽一免傳寫之誤
二免翰墨之勞或有索之易爲脫本審篆隸無纖毫之失
質人神無愧恥之心古今所疑坦然明白如其漏畧以俟
君子

十在文

代顧在
詢作

興土木於禁中選驍雄於手下爰持斧鉞出鎮藩籬飾宮
殿於遐方命鑿輿而遠幸爲釁之端爲禍之原有王承休
在摧挫英雄吹揚佞媚全無才智繆處腹心斷性命於戲

玩之間戮仇讐於樞機之下有功勞而皆棄非賄賂而不
行有宋光嗣在受先皇之付託爲大國之棟梁既不輸忠
又不知退恣一門之奢侈任數力之驕矜徒爲貪饕之人
實非社稷之器有王宗弼在妄陟雲霄殊非謇諤與亂本
則逞章程之妙恣奸謀則事頰舌之能心口傾危尚居左
右有韓昭在性懷慘毒心恣貪殘焚蕪軍營恢拓私第不
顧喧騰於眾口惟思自任於忿懷有歐陽晃在酷毒害民
市井聚貨叨爲郡守實負天恩瘡痍已徧於陽安蒙蔽半
由於內密有田魯壽在爲君王之元舅受保傅之尊官但

務奢華不思輔弼第宅迴同於上苑金珠求滿於貪心有
徐延瓊在出爲畱守入掌樞機無諤諤以佐君但唯唯而
徇旨有景潤澄在搜求女色取悅宸襟常叨不次之恩每
冒無厭之寵敷對惟誇於便捷佐時不識於經綸素非忠
勤實爲忝竊有嚴凝月在唱亡國之音銜趨時之侈每爲
巫覡以翫聖明致君爲桀紂之昏使上乏唐虞之化有臣
在陛下任臣如此何憂社稷不安

許寂

寂字閑閑棲四明山昭宗徵赴闕召對內殿尋請還山寓

呂江陵唐末除諫官不起趙匡凝奔蜀寂偕行蜀主王建
待以師禮位至蜀相同光末平蜀從王衍降授工部尚書
致仕清泰三年卒年八十餘

上蜀主求賢書

歷代之君乘時啟運莫不博訪髦士詳求碩畫以武定禍
亂以文致康義故軒皇命六相虞舜舉八元伯禹拜昌言
成湯師一德周有多士文王以寧此歷代之大經求賢之
極摯也今百辟之中有謀可以策國勇可以盪寇或博究
治體或精知化源未擢穎於明廷尚舍光於庶位者伏望

恢明聖之畧開戶牖之圖親賜顧問以觀其能置之列位
盡其獻納俾官無敗政人無滯才

謝信物書

右件鞍轡馬腰帶甲冑槍劍麝臍琥珀玳瑁金陵碗越瓷
器竝諸色藥物等皆大梁皇帝降使賜貺雕鞍撼玉堅甲
爍金十圍希世之珍六轡絕塵之用槍森蛇櫛劍耀龍鋒
金陵含寶碗之光祕色抱青瓷之響上藥非蜀都所紀名
香從外國稱奇遠有珍華竝由惠好顧酬謝而增愧仰渥
澤以難勝捧閱品名實慙祇受

蜀答聘書

大蜀皇帝謹致書於大梁皇帝閣下竊念早歲與皇帝共
逢昌運同事前朝俱榮倚注之恩竝受安危之寄豈期王
室如燬大事莫追橫流泛濫於八方衰釁凌夷於九廟此
際與皇帝同分茅土共統邦家扶危者力旣不宣握兵者
計無所可某忝列同盟之分幸居平蜀之功所宜治兵甲
以固封疆聚征賦以修進貢望星使而經年不至指雲鄉
而就日無期遠聞皇帝應天順人開基立極拯生靈於塗
炭示恩信於豚魚東南之王氣咸歸河洛之殊祥畢至四

門盡闢百度惟貞竟無意於興邦止施仁而濟物以此內
量分限不在經綸七十州自可指揮八千里半因開拓遂
至萬民叶議八國來朝爰徵史冊之文亦有變通之說且
東漢亂離之後三國齊興西周微弱之時六雄競起俱非
恃彊逼禪皆以行道濟時雍容於揖讓之前輕重於英雄
之內况西蜀開山立國燒棧爲謀稱雄雖處於一隅避狄
曾安於二帝鼎峙之規模尚在山呼之氣象猶存永言梁
蜀之懽合認弟兄之國今蒙皇帝遠尋舊好專降嘉音坦
無間諜之嫌再敘始終之約款慮則春冰共泮開通則東

海可歸光榮遽被於子孫暢遂咸勇於草野今則盡焦勞而勵已用勤儉以師賢常瞻偃草之風以繼用天之道又蒙厚加賜貺別降珍奇十驥聯鑣六龍竝駕稱德曾參於萬乘呈才皆過於千金載觀戀主之心益勵懷恩之志寶帶輟異方之貢名香加遠國之珍奇鋒利過於雪霜雅器價齊於金玉入用多慙於未識捧持方喜於初觀望思而一日三秋仰德而跬步千里自此榮遵天路繼遣星槎絨章不候於飛鳶裂帛豈勞於繫雁忻榮慰嘉併集此時敬以專使盧卿等迴備陳所志幸望開覽謹白

欽定全唐文卷八百九十目錄

鄭藝

武德軍節度使徐延瓊德政碑

王鐔

王衍降表

上蜀主奏記

劉纂

請禁醉粧

蒲禹卿

諫蜀後主東巡表

應制科策

應制

王留主奏

王留制策

王留

王留軍備

王留

欽定全唐文卷八百九十目錄

欽定全唐文卷八百九十

鄭藝

藝仕蜀後主爲翰林學士

武德軍節度使徐延瓊德政碑

臣嘗讀唐書竊覩太宗每以爲將致治平必先仁義得賢則理失人則危可鑒格言足徵邃古豈不以化馴易服威束難齊哉然農戰交修德刑共舉將亂也其政必隳將弊也其風必佻將圖九合之威亦賴五臣之佐苟虞害眾莫若任賢視今可以知昔矣高祖皇帝以汴賊弒君唐朝絕

嗣左袒罕聞其歸漢同聲皆倣於吠堯上下相蒙酣爲醉
國寰區之內億兆無依競陳推戴之誠願正君臣之位難
違衆欲遂啟丕圖戡禍亂而俟中興協會盟而歸大國爲
蜀之帝報唐之恩明孝皇帝受命之六年天清地寧珠連
璧合肇修人紀於變時雍至若皇墳帝典之精河圖洛書
之奧步驟於羲軒之際損益於文獻之間不然何其盡美
盡善之如是也遂使蠻夷向化吳越輸珍麟鳳效祥草木
呈瑞矧復英賢間出俊乂羅生上猶以爲未也方且思聖
父勤求登用才哲循名責實較德論功沮勸有謀黜陟不

濫鑿乾締構允歸睿作之功壽國陶鎔必有挺生之佐予
扶昌運對越上元由是中外文武將相公卿洎庶尹庶史
各率厥職奉若天旨越正月武德軍將校吏民緇黃耆艾
等列狀詣護軍使請以節度使徐延瓊德政上聞願勒碑
紀且以借畱爲請上憂勤庶政以百姓爲心凝旒稱嘆者
久之謂翰林學士藝曰朕司牧元元將開壽域使國內郡
縣治行皆如梓潼朕何憂哉夫吏久於官古之道也況眾
欲之乎朕旣俞其請矣卿爲我撫其懿實播無窮之聞以
塞民望微臣奉詔恐懼敘曰臣聞龍飛九五山川效雲將

之靈鵬擊三千風水運波臣之化雖復同心同德雅資十
亂之功乃聖乃神永賴八元之佐內則皋夔協贊外則方
召專征神謀且貞師律具有兼膺注意宜屬宏材此我皇
帝之御宇也不顯帝圖顧茲天力四神踐雪五老飛星投
綸負鼎之賢爭伸宏業委輅請纓之士競奮深機蕙帳空
而明月常孤蒲輪至而清氣日激猗歟雖居宣武之間未
若我朝得人爲盛也其或家在岷里身陟齋壇益揚謙損
之風靡見驕矜之色功超賈鄧政邁黃韓有若武德軍節
度使徐公斯可謂一時之英也公名延瓊字敬明東海剡

人卽國之元舅也世緒標奇門風襲煥鎮爲峯鼎用作雄
鏑父子則貴比金張兄弟則政同魯衛騰八龍之聲價齊
一鳳之羽儀阮竹皆芳田荆竝茂金相玉印各炫晨葩虎
節獅壇共觀畫錦徒思徧舉抑亦倦譚公王父唐京兆武
功縣令追贈尚書左僕射太師高平王政績頻彰勲華早
振自激封侯之志夙垂濟世之名竝西晉殊功勞連邸第
南朝雅望地顯官婚貽謀各著於承家致用皆光其佐命
朱輪華冕豈獨推恩甲令門風實先種德是賢奕葉孰與
提衡歷佐昌朝宜鍾異氣公中邱會秀大爽炳靈幼挺英

姿夙彰雅操稟說禮敦詩之教蘊經文緯武之才欲紹家
聲遂參戎右敵國相吞之候決在毫釐陰符必勝之機制
於掌握琯戈寶鼎門崇八命之榮玉帳金壇神授六韜之
妙故能名高大國業嗣良弓輕鎮北之無文恨征南之不
武圮橋靈叟謂謀畧之可傳汶水神翁知功名而必立自
繼膺睿睠兩踐渙符四封無刁斗之音千里有袴襦之詠
政成剖竹擁重執金掌領孤兒每警巡於晝夜扈隨大駕
遠鎮定於邊陲纔復六飛將分雙節上以郵城奧壤潼水
名區粵自艱難久罹瘡痍獄市無寄杼軸皆空羣盜猖狂

幸寇恂之去日遺黎憔悴望郭汲之來時不有改張何其
俾人爰求賢帥式憇雄藩乃授公武德軍節度使公攬轡
邁征下車畢理彈壓豪鷲封殖疲瘵究本尋源提綱振領
害於人者雖大必去利於人者雖小必行嘗謂人曰法者
政之要也不可不峻其隄訪禮者教之本也不可不謹其
律度食者民之命也不可不勤其稼穡兵者戰之器也不
可不肅其號令率是四者盡其一心上可以翼衛朝廷下
可以儀刑藩翰吾得之矣爾其觀焉公以管內數多亡命
姑務偷生久聚萑苻常爲虺蜴狡穴皆依於窮谷妖巢各

恃於幽林化之不悛來而復叛郡邑虞其蹂躪路歧苦於
斂數公密運良籌周旋峭格盡投私咎皆挾禍胎益其戎
兵誠其強吏商旅無滯貢奉罔艱王尊申京兆之威龔遂
去潢池之患勞徠罕倦蕩析咸歸動有常規賞無橫費上
勤時貢下贍軍須月未及其授衣士已忻於挾纊賑其匱
乏釋彼愁顏幸夜犬不驚宵魚自放哀矜庶獄愼恤惟刑
赭衣盡伏其神明丹筆立分其情僞絕加等之聚斂革無
名之征徭平衡不謬於錙銖嘉量罔欺於圭撮公又仰稽
前古俯瞰遺蹤思棗祗闢地之謀味韓浩屯田之計膏腴

靡棄黍麥頻豐夢果應於牧人利可資於寡婦貢賦加倍
獻奉相望又歲別進軍食因沃潤之鄉置牢盆之務商徒
繁會官帑委輸檢吏通民機能制用矯時阜俗儉以率先
貫天錢而已應星文認寶氣而已有雄劍闕來奏課遵最
聞薤本可畱足表富人之術芋區難竝咸知濟物之方公
以鳴社嘉辰繞樞令節祈聖壽有莊嚴之懇祝宗祧於降
誕之期自捨俸金於惠義寺構華嚴大閣向者公府未完
軍衛莫稱於是載修輪奐別創規模庭架虹梁門羅虎戟
層樓燕賀偏增鼓吹之雄廣厦翬飛益動旌旗之色路當

衝要地控都畿使車晝夜以交馳候館往來而宿餉每傾
公帑用飲賓筵休聲洽聞靈貺昭感紫芝三秀黃犢竝生
天唯發祥地不愛寶掩得禾之異果符登麥之文歌德
詠仁言將不足含和吐氣樂固難名大矣哉公之問俗觀
風阜財述職焉可得而稱也爵賞既行中外同喜遂冊拜
中書令趙國公加食一千戶通前五千戶公嶽降標奇星
精稟異溫如圭璧郁若椒蘭智合韜鈴言無鈎距運籌決
勝荀攸可比於良平仗鉞被威謝艾足同於方召研幾昭
禮植操資忠允武允文多材多藝軍中講學馬上註書揮

刀則立覩飛泉盤弭則惟聞折樹而又貴不自滿謙而益
光饗士投膠延賓比飯帳下之犀渠貝冑咸感吮癰樓中
之螭首蛾眉寧矜笑蹙閨門密行簪組美譚里巷相觀風
雲動色宸衷夙注寵詔已行致闔境之允諧固本朝之是
衛况家豐懿戚治陟殊尤心膂連營蓄雷霆於北落股肱
重鎮寄柱石於東川克副分憂合膺異渥宜其珉麗德瑩
檢圖功懋績著擁旄化行偃草比屋而乞畱侯霸叫閭而
願借耿純詎可使螭首翠碑未披文而相質麟臺彩筆不
寫照以傳神臣志慕陽秋工非潤色仰遵睿旨敢述殊勲

曾無少女之詞豫怯中郎之鑒所冀陵遷谷變尚窺沈水
之文地久天長永覩生金之字謹爲銘曰

金行啟運鼎業鑿乾麟御瑞紀鳳舞昌年層潤浩注國祚
遐延光凝寶匣福靄祥編上詰繼文皇圖增煥得一踐羲
登三轆漢懿綱牢籠大壚眞觀宗社還資微明接旦太虛
寥寥中有元精麗物爲瑞麗人爲英英英徐公爲毗而生
脂膏不染獄市無驚智勝兵強化行民附屢立奇功繼膺
寵數帝念徐公聿齊其務迺睠梓潼并有饒賦公至若何
時雨霽霽枯苗濯穎涸轍騰波摧奸禁暴剋弊止訛襁負

而至動植興歌八政何先以食爲天卧鼓勤農免胄服田
耒耜接肘臺笠摩肩閭閻風靡稼穡雲連眾害旣去纖惡
皆除頒宣化育慎恤刑書徽纆自朽囹圄常虛輕徭薄斂
政協蒲盧老安少懷遠至邇肅風雨時若家給人足戶溢
版籍賦登公牘儲峙孔多貢輸相屬神明之正誰爲之師
公之俱美福祿攸宜位隆鳳詔恩注龍墀梓人頌德天子
嘉之爰命荒墟奉揚馨烈揚子神疲江生思絕涪水東注
銅山西揭帶礪無期永旌賢哲

王鐸

鐔字鱸祥天復時奉使西川因畱蜀官翰林學士遷御史
中丞武成二年除中書侍郎同平章事後唐莊宗滅蜀入
洛陽官刺史

王衍降表

臣先人受鉞坤維作藩唐室一開土宇垂四十年屬梁孽
挺災皇綱解紐不能助逆遂至從權勉徇輿情止王三蜀
固非獲已未有所歸逮臣纂紹罔敢怠遑自保土疆以安
生聚陛下嗣唐虞之業興湯武之師廓定中區奄征不諛
梯航畢集文軌大同臣方議改圖便期納款遽聞致討實

抱驚危今則委千里封疆盡爲王土冀萬家臣妾皆沐皇
恩輿櫬有歸負荆俟罪望迴日月之照特寬斧鉞之誅容
佇德音以安反側儻墳塋而獲祀實存沒以知歸臣無任
望恩虔禱之至

上蜀主奏記

伏以羲皇演卦神農造書陶唐克讓是昌禮樂有虞濬哲
乃正璇璣禹湯文武功濟天下故能卜世延遠垂裕無窮
逮乎六國諸侯力征秦滅墳典以愚黔首遂使聖人糟粕
掃地都盡漢承秦弊下武尊文蕭何入關唯收圖籍文帝

修學校舉賢良海內晏然興崇禮義景帝躬履節儉選博士諸儒以備顧問麟書鳳紀填溢於未央玉版金繩充物於祕府班固曰周稱成康漢稱文景宜哉武宣之世乃崇禮官開金馬石渠之署以議典禮樂置協律之官以分雅鄭公卿大夫間作於世或紓下情以通諷諭或宣上德以盡忠孝孝成之世奏御者千有餘篇獻納論思之盛夏古罕比世祖承喪亂之餘龍驤宛葉去暴誅亂拯溺救焚寬以用人明以率下兵革既息寰海乂寧乃起立太學招致鴻碩羣臣每有奏議必命史官撰集以傳後世數引公卿

講論經義夜分乃寐不以爲勞孝明師事桓榮躬親文墨
朝誦夜講明達過人孝章崇尚文儒有太宗之遺風嘗於
白虎殿會集羣儒推演乾坤考合陰陽上申聖人下述品
物參於傳記內別六經若披浮雲而覩白日設華燈而入
閭室詔元武司馬班固纂集其事名曰白虎通魏武博覽
羣書特好兵法鈔畧書史名曰節要又注孫子十三篇尤
好篇詠動爲典則文帝八歲能屬文博覽古今貫穿經史
及居帝位益尚謙和坐不廢書手不釋卷晉宣博學洽聞
服膺儒教當曹氏中微總攝百揆萬幾之暇未嘗廢卷景

文之間咸重儒術宋高祖豁達大度涉獵典墳討伐之中亦重文墨文帝博涉經史尤善隸書每誡諸子率以廉儉南齊高帝深沈大量清儉寬厚嗜學好文曾無喜愠常曰學然後知不足余恨無老成人得與周孔比德兼善草隸有飛動之勢梁武該博多聞有文武之畧在位冬月秉火執筆手爲皴裂諸子悉有文藝聚書討閱晝夜忘疲元帝好易韋編三絕東閣聚書十四萬卷象牌玉軸輝映廊廡陳武倜儻雄傑過人窮究兵書耽玩史籍文帝畱意經典舉動端雅後魏道武立臺省興儒學五經各置博士講問

如市塾序成林北齊有文林學館周武帝保定中書盈萬
卷平齊所得纔至五千卷置麟趾殿學士以掌著述隋平
陳之後牛宏分遣搜訪異書經史漸備凡三萬餘卷煬帝
於東都觀文殿東西廂貯書寫正副各五十分爲三品除
祕書所掌而禁中之書在焉唐高祖統一區宇剗革暴隋
六合宅心四海歸德躬行仁義以息亂階太宗神睿聖文
天資英武嘗在藩邸命博學之士房元齡杜如晦等一十
八人爲秦府僚佐大較儒術廣聚經史及居帝位隨才擢
用於宏文館皆置學士元宗開元五年於乾元殿置修

書使召學士張說等讌於集仙殿東廊下寫四部書以充
內庫麗正殿置修書使又召學士張說等讌於集仙殿改
名集賢其修書使爲集賢殿學士自是圖籍不獨祕書省
宏文崇文館皆有之集賢所寫則御書也分爲四部一曰
甲爲經二曰乙爲史三曰丙爲子四曰丁爲集兩京各一
本共二萬五千九百六十卷經庫書白牙軸黃帶紅牙籤
史庫書青牙軸縹帶青牙籤子庫書紫檀軸紫帶碧牙籤
集庫書綠牙軸朱帶白牙籤以爲分別以大學士專掌之
歷代以來咸有祖述廢置沿革或有差異今但畧舉帝王

故事及祕書之職幸冀垂覽焉

劉纂

纂桐廬人一云長沙人唐左拾遺蛻子仕蜀歷任禮部尚

書國亡復事孟氏

請禁醉粧

下之從上如風偃草以仁義理法化之則為謹愿之行以
驕奢淫佚化之則為狂薄之俗今一國之人皆效醉粧臣
恐邦基頽然如人之醉而不可支持也

蒲禹卿

禹卿成都人蜀乾德四年對策擢右補闕出爲秦州節度判官國亡從後主入洛陽後主被誅題詩驛門逃去不知所終

諫蜀後主東巡表

臣禹卿頓首死罪臣聞堯有敢諫之鼓舜有誹謗之木湯有司過之士周有戒慎之鞆蓋古者明君克全帝道欲知已罪要納讜言將引咎而責躬庶理人而修德陛下自承祧秉籙正位當天愛聞逆耳之忠言每許犯顏而直諫且先皇帝許昌振跡闡苑興師歷艱辛於草昧之時受危險

於虎爭之際胼胝戈甲寢寐風霜申武力而助中原立戰
功而平多壘亡軀致命事主勤王方得成家至於開國今
日鴻基霸盛大業推崇地及雍岐界連荆楚信通吳越威
定蠻陬郡府頗多關河甚廣人物秀麗土產繁華當四海
輻裂之秋成萬代龍興之業陛下生當富貴坐得乾坤但
好歡娛不思機變臣欲望陛下以名教而自節以禮樂而
自防修道德之規受師傅之訓知社稷之不易想稼穡之
最難惜高祖之基模似太宗之臨御賢賢易色孜孜爲心
無稽之言勿聽弗詢之謀勿用聽五音而受諫以三鏡而

照懷少止宿於諸處林亭多歷覽於前王書史別修上德
用卜遠圖莫遣色荒無令酒惑常親政事勿恣同遊臣竊
聞陛下欲出成都看於邊壘且天雄地遠路惡難行險棧
欹雲危峯插漢稍雨則吹摧閣道微泥則阻滑山程豈可
鳴鑿唯堪叱馭又復秦州敵境咫尺塞邑荒涼人雜羌戎
地多疫瘴別無風華異境不可選勝尋幽隴水聲注 笳
韻咽營中只帶甲之士城上宿枕戈之人看烽火於孤峯
朝朝疑慮覩望旗於絕嶺日日隄防是多山足雲之鄉卽
易動難安之境麥積崖無可瞻戀米谷峽何足聞知縱過

嗟山須通怨水秦穆圉馮之地隗囂僭位之邦其次一人
出行百司參從千羣霧擁萬眾星馳當路州縣凋殘所在
館驛隘小止宿尚猶不易供需固是極難縱若宮中指揮
自破屬省錢物未免因依擾踐觸處凌持以此細論不合
輕動其類蒼龍出海雲行雨施豈合浪靜風恬必見傷苗
損物所以鑿輿須止天步難移况頃年大駕只到山南猶
不下關進發兵士此時直至天水未審制置如何當初打
破梁原城池鹵掠義寧戶口截腕者非一斬首者倍多匪
惟生彼人心而亦損茲聖德今去洛京不遠復聞大駕重

來彼則預有計謀此則便須征討况鳳州久爲讐敵必貯
姦謀切慮妄指妖詞致生釁隙又陛下與唐國方申歡好
信幣交馳但慮聞道聖駕親行別懷疑忌其事專差使命
請陛下境土會盟未審聖躬去與不去若去則須似秦趙
爭強彼此難屈若不去則便同魯衛不睦戰伐滋興酌彼
未萌料其先見願陛下思忖臣伏聞自古皇帝省方巡狩
弔民伐罪展義觀風然後便歸九重別安萬姓陛下累曾
遊歷未聞一件教條止於踐履山川驅馳人馬闔苑則舟
船幾溺青城則嬪嫔將沈自取驚憂爲何切事及還京輦

竝不說於軍民迫鬱眾情莫彰帝德憶昔先皇帝在日未
有無故巡遊陛下纂承已來樂意頻離宮闕此時依前整

蹕又擬遠別宸居昔秦王之鑾駕不迴煬帝之龍舟不返

陛下聖逾秦帝明勝隋皇且無北築之虞焉有東遊之弊

陛下寬仁大度廣孝深慈知稼穡之艱難識古人之成敗

自防得失不縱襟懷豈忍致却宗祧

闕二字

道斷使烝民以

何託令慈母以何辜若不慮於危亡實恐乖於仁孝况玉
京金闕寶殿珠樓內苑上林瑤池瓊圃香風滿檻瑞露盈
盤鈞天之樂奏九韶迴雪之舞呈八佾簇神仙於紫禁耀

珠翠於皇宮如論萬乘之君便是三清之境人間勝致天下所無時或追遊足觀奇趣何必顧於遠塞看彼荒山不惜聖躬有何裨益方今中原有人大事未了但當國生靈受敝盜賊橫行縱邊庭無烽火之虞而內地有腹心之患陛下千年膺運一國稱尊文德武功經天緯地孝逾於舜仁甚於湯百行皆全萬幾不撓聰明博達識度變通深負規模獨懷英鑒方居大寶正是少年既承社稷之基復抱山河之險何不視遠聽察居安慮危闢四門以求賢總萬幾而行事咸修一德端坐九重使恩威並行賞罰必當平

分兩路徧療瘡痍庶表裏寬奢保子孫昌盛布臨人之惠
化蓋救物之三功選揀雄師思量大計振彼鳴張之勢壯
茲虎視之威秣馬訓兵豐糧利器彼若稍有微覺此則直
下平吞正取時機大行王道自然百靈垂祐四海歸仁眾
心成城天下治理今則蜀都強盛諸國不如賢士滿朝聖
人當極臣願百姓樂於貞觀萬乘明於太宗採藥石之言
聽芻蕘之說愛增社稷醫療君民同武王諤諤而昌鄙商
紂唯唯而滅無飾非拒諫之事有面折廷諍之人固我春
朝保我皇化陛下莫見居人稠疊謂言京輦繁華蓋是外

郡凌殘住止不得所以競來湊集暫一偷安今諸州虐理
既多百姓失業欲盡荒田不少盜賊成羣伏乞陛下
腹心卽當聞見蜀國從來創業多乏永謀或德不及於兩
朝或祚不延於七代劉禪俄降於鄧艾李勢遽歸於桓溫
皆謂不取直言不恤政事不行王道不念生民以至國亡
人心何保山河之隘不足爲憑陛下至聖至明如堯似舜
豈後主而相匹豈子仁而比倫有寬慈至孝之名有遠見
長明之策不信倡媚不耽荒淫出入而所在防微動靜而
無非經久必致萬年之業終爲四海之君願陛下且駐鑾

輿莫離京國候中原無事八表來王天下人心咸歸我主
若羣流赴海眾蟻慕羶有道自彰無思不服匪惟要看天
水直可便坐長安是微臣至懇舉國之深願也臣聞昔
者天子有爭臣七人雖無道不失其天下是以輒傾丹懇
仰諫聖明不藉官榮不謀名譽情非訕上理切愛君雖無
折檻之能但有觸鱗之罪不避誅殛爰叩天庭臣死如萬
類之中去一螻蟻陛下或全無忖度須向邊陲遺聖母以
憂心令庶寮以懷慮全迷得失自取疲勞倘有不虞悔將
何及臣願陛下稍開諫路微納臣言勿違聖后之情且允

國人之望俯存大計莫去邊陲干犯冕旒無任憂惕冒死
待罪激切屏營之至謹奉表直諫以聞臣某誠惶誠恐頓
首頓首死罪死罪謹言

應制科策

今朝廷所行者皆一朝一夕之事公卿所陳者非乃子乃
孫之謀暫偷目前之安不爲身後之慮衣朱紫者皆盜跖
之輩在郡縣者皆狼虎之人姦佞滿朝貪淫如市以斯求
治是謂倒行